

中國方志叢書・華中地方・第八一一號

據

清・陳蘭森等修，謝啓昆等纂
清乾隆五十四年刊本

影印

江西省

南昌府志



成文出版社有限公司印行

重修南昌府志序



乾隆辛酉予以幼齡隨侍先
大父來撫豫章得攬鄱湖廬山
之勝縱浩瀚嶽寄之觀心焉志
之嗣復往來過從又自廣饒撫
建土湖策臨蓋足跡所歷幾半

江右大都土地瘠薄風俗醇樸
士矜節義民尚儉勤迄今由袁
州調守南郡距四十餘年矣維
南昌職司首郡提封千里厭原
磐峙章贛襟流形勝鬱積人傑
地靈官斯土者亟思所以撫綏

聖天子

而整飭之異以化成俗美上副
延洪熙洽壽考作人之盛庶
幾無負厥職耳且夫宣猷敷政
之本惟是稽古居今採風問俗
將以上為德而下為民也考沿
革之籍可以詢土俗之宜察疆

輿之廣可以規撫馭之周歷山
川之阻可以籌防守之備稻田
賦之鉅可以思培養之方考學
校選舉之規名宦鄉賢之跡可
以儲教化之原紀人材之盛爵
封廕卹典禮崇隆孝子節婦誼

行炳蔚可以獎尊親而崇風教
他如孺子名亭滕王紀閣名人
遺趾往哲幽光一言一行佚事
傳聞亦皆足以動學士大夫之
流連慨慕於不容已而顧令徵
文考獻卷帙缺如豈非地方有

司之咎哉南昌舊有志修於康熙二年漫漶闕畧久無完本乾隆丁酉前守湯公創議重輯越四年而黃公芝雲始立局纂修闕門別類未竟而去丙午春予始調茲郡念先人舊治之區

思昔年風化之醇已復渺矣難
追而郡志未成參稽無據心滋
戚戚乃於公暇圖所以竣厥事
者於是延訪士紳名宿於戊申
春重為置局取芝雲舊本詳加
訂正有仍舊文不改者有參衆

議更訂者複者刪之缺者增之
其自乾隆壬寅至今者亦為補
載體例詳畧悉紀凡例中分門
二十得卷七十有六歲方一周
而郡志於是裒然成書顧思志
之為志所以資掌故備采訪也

郡志與省志體制異亦與縣志
繁簡殊蒐討舊章鈎稽近事斟
酌盡善良非易易今志本粗成
條目井井雖未敢謂辭臻美備
事無遺佚然索圖徵獻於土宜
風俗之畧興革損益之大已犁

然具舉撫是編而舊典可循時
事可稽此日坐而言者亦即起
而可行而詎徒曰淹雅是矜華
藻相尚已乎遂書之以為序
乾隆五十四年歲次己酉署江
西布政使司事鹽法巡道前南

昌府知府陳蘭森序



南昌府志

凡例

一志首必有圖地方之高下廣狹政治之修舉得失皆可按圖而得古人謂不出戶庭而周知天下之故者此也舊志惟有境圖而無治圖今倣隋志公館圖之意而增之

一豫章之名始於春秋後之志沿革者率自周始然春秋時之豫章在楚晉之地非南昌也南昌之豫章自晉始故表以晉爲斷

一南昌星野斗分屬禹貢揚州之域所包甚大今但以斗

十度隸南昌列於疆域之首而不另爲一門其從前之
繁引概刪之庶幾天文地理一目瞭然

一首郡附郭省城卽府城統轄公署胥在於是今以城池
爲府建置之首先統轄而其次及南新二縣之署其六
屬則均仍其舊倉儲次之

一山川爲一郡之望雖匡廬彭蠡不隸本郡而新建山之
厭原水之章江奉新之百丈修水汝水其川停嶽峙有
關疆域向皆籠統雜列觀者混淆今仍分路分縣而記
之若水利津梁尤地方所重者卽附於水之次云

一民賦以

國朝爲斷故裒列於卷之首等而上之冊籍漫漶可稽者仍之
至郵傳之政支銷正供賦所係也今彙之卷末以備稽
考

一養而後教民賦之後繼以學校所以崇教化也其間因
革損益敬謹備載而書院義學社學悉附焉

一武備爲防禦要務凡統轄及駐防官弁備載之有名不
可考者缺焉

一祠祀載在祀典壇廟綦重矣其有功德於民而建祠祀
之百年俎豆香火爛焉未可泯也至梵宮琳宇由來已
舊亦姑仍其舊云

一名蹟原以人傳孺子之亭滕王之閣尙矣今並著其本末而以傳誦之詩文附於本事之下以便考覽若邱墓所在往哲幽光尤不可不表而出之也

一各屬志有祥異一門語多荒誕今稍爲刪訂庶不失之浮夸

一職官紀自知府以下不載統轄別於省志也其治行卓卓者立名宦傳以志甘棠之戴

一選舉首薦辟次科甲次諸貢次援例一命之榮亦登仕版別於庶人也至封爵之後繼以封廕而例請

封典者大小悉備載廣